

儀
顧
堂
題
跋

儀顧堂題跋卷四

歸安陸心源剛甫撰

影宋抄東家雜記跋

東家雜記二卷影寫宋刊本題曰右朝議大夫知撫
州軍州事兼管內勸農使仙源縣開國男食邑三百
戶借紫金魚袋傳編前有自序後有四十六世孫宗
翰家譜序四十八世孫端朝五十世孫擬跋每頁二
十行每行十八字編首列杏壇圖說及琴歌壇作三
重與錢遵王敏求記所載宋本合傳自序與祖庭廣
記附刻者字句稍有異而作序歲月亦不同初頗不

解既而思之乃得其故蓋是書先刊于北宋宣和六年時傳官朝議大夫知邠州徽欽北狩傳隨高宗南渡紹興甲寅階朝散大夫官知撫州版亡于金乃改作序年月而重刊之元措入金所據者宣和六年北方所刊之本此則據紹興刊本所影寫也

影元抄孔氏祖庭廣記跋

孔氏祖庭廣記十二卷題曰資政大夫襲封衍聖公
知集賢院兼太常丞五十一代孫元措謹續編前有
金正大四年丁亥元措自序左丞張行信序及宋元
豐八年孔宗翰家譜舊引宣和六年孔傳祖庭廣記
舊序每頁二十二行每行二十字金時鐫板于南京
此則从蒙古壬寅重雕本所錄出也其書合家譜祖
庭雜記而增益門類冠以圖象故曰廣記其記先聖
生日爲魯襄公二十二年十月二十七日庚子與史
記世家作十一月庚子者不同又聖妃并官氏不作

儀顧堂題跋卷四

二

元官與禮器碑合足證明刊家語之妄

廉吏傳跋

廉吏傳二卷宋費樞撰鈔本提要樞字伯樞成都人
自序題宣和乙巳蓋作于宋徽宗末年前有辛次膺
序稱其以藝學中高第其仕履始末則無考也案樞
廣都人祖求熙甯進士官止眉山令樞亦登進士第
宣和初徒步入京師將至長安舍旅館主人婦美少
新寡夜就之樞不可問知乃京師販繒人女因訪其
父俾取而更嫁之人稱其清紹興十六年以左朝散
郎知歸州見繫年要錄一百五十五卷

籀史跋

籀史一卷宋翟耆年撰舊抄本案耆年字伯壽以父汝文任入官自少知友名士劉器之甚愛之而以著騷見稱于張文潛好古文介編不苟合自謂爲吏必以戇罷放浪山谷閒箸書自娛范宗尹欲召之蘇庠曰翟子清濁太明善惡太分此張惠恕所以不取容于當世也旣老自號耨涖老隱見嘉定鎮江志

宋本名臣碑版琬琰之集跋

新刊名臣碑版琬琰炎之集上二十七卷中五十五卷
下二十五卷題曰眉州進士杜大珪編宋刊本每頁
三十行每行二十五字前有紹熙甲寅無名氏序北
宋名臣碑狀墓誌畧具于斯三集所錄多取之隆平
集惟姑溪居士李之儀所撰范公行狀今載忠宣集
中此本未錄南宋祗錄張浚行狀劉珙行狀劉子羽
墓誌碑銘李顯忠行狀虞雍公守唐事而于李忠定
綱种忠憲師道宗忠簡澤趙忠簡鼎呂忠穆頤浩胡
忠簡銓岳武穆飛韓忠武世忠朱文公熹呂成公祖

謙趙忠定汝愚誌狀不登一字亦缺典也

草莽私乘跋

草莽私乘一卷題曰南村陶宗儀抄輯舊抄本所錄
凡宋季元初忠臣孝子節婦傳序二十篇龔開文集
久佚文信國陸君實兩傳藉此以存程敏政宋遺民
錄不及此本之善是書手稿嘉靖中爲王弇州所藏
江陰李貫从王氏錄副以傳貫字如一好古嗜書致
盡滅先人之產嘗從事三禮借錢謙益衛湜禮記集
說焚香肅拜而後啟視其愛書之癖如此此冊卽李
如一抄本後歸曹倦圃有曹溶之印白文方印秋岳
二字朱文方印構李曹氏朱文長印曹溶私印朱文

方印樵李曹氏攷藏圖書記朱文方印道光中歸百
宋一屋黃堯圖孝廉有跋

宋繫歷代故事跋

歷代故事十二卷不著撰人名氏宋刊宋印本前有無名氏序

四庫未收各家書目亦未著錄序署坤甯殿題則當爲皇后所製因以序中老見永陽郡王一語求之知爲宋楊次山所輯其序則甯宗楊皇后所製也次山字仲甫后之兄也其先開封人家于越之上虞少好學能文補右學生后受冊封永陽郡王後封會稽郡王卒年八十八韓侂冑之誅悉出其謀事詳宋史外戚傳及后妃傳史稱后涉書史知古今其序當后所

自製壬申年甯宗嘉定五年也其書乃次山手書付
刊書法娟秀可喜嘉定壬申距今七百餘年完善如
新良可寶也

元板吳越春秋跋

吳越春秋十卷題曰後漢趙晁撰前有徐天祐序卷
十末有大德十年歲在丙午三月音注越六月書成
刊板十二月畢工兩行前文林郎國子監書庫官徐
天祐音註一行正議大夫紹興路總管提調學校官
劉克昌及儒學梁相等銜名四行每頁十八行每行
十八字小字雙行每行廿六七字不等版心分上下
兩卷明覆本款式及卷末題名同惟每頁十六行每
行十七字板心分十卷異于元槧耳是書有宋汪綱
刊本行數字數與元刻同卷九女卽捷末下多操其

本而刺處女女應卽入之三八處女因杖擊之二十
字今不得見

四庫所收序存而缺徐天祐姓名致不辨爲何人所
作漢魏叢書本古今逸史本皆并爲六卷仍用天祐
注不著其名並削其序最不足據此本首尾完具模
印精良雖不及宋本亦是書之善本也卷中有張紹
仁印白文方印學安朱文方印蓋吳中張學安舊藏
也

影宋本陸氏南唐書跋

影宋本陸氏南唐書姚舜咨舊藏首行書某紀某列傳而列南唐書于弟幾之下與錢遵王所見宋本合以汲古閣本校之篇題既改誤謔亦頗有潘佑傳脫落尤多援據精博下脫合悌二字草南漢主書毛本誤作草勸南漢書文不加點下脫後主咨賞四字中書舍人下衍後主二字脫以字稱之下脫而不名佑四字嘗作文下脫一篇名曰貽別其辭八字物亦無奈我下毛本衍也字下脫兩不相干故泛然之也故浩然之也十四字幸此本得正其誤他如徐遊傳大

鐵篴毛本篴誤作篴按篴卽說文簾字竹器也可以
取粗去細者也篴字不見于集韻類篇篇海始有此
字音忽釋爲有病竹不堪用者與篴義迥殊蓋刻匠
之誤也古夫于亭雜錄稱其門人大名成文昭寄以
朱槩本凡十五卷與今刻十八卷編次小異愚謂宋
本日錄三紀與列傳十五卷各爲起訖汲古本則通
計爲十八卷恐漁洋未檢全書但見卷末題列傳十
五而遂誤認爲十五卷耳非與此本有異同也

唐餘紀傳跋

唐餘紀傳十八卷吾鄉前明陳水南霆輯彭文勤知聖道齋跋尾譏其全襲陸書倒置前後改竄名字以博著述之名是矣愚謂更有刪所不當刪增所不當增者如陸書徐鍇傳荐于烈祖未及用而烈祖殂元宗嗣位起家祕書郎齊王景達奏授記室時殷崇義爲學士草軍書用事謬誤鍇竊議之崇義方得君誣奏鍇泄禁省語貶烏江尉歲餘召還授右拾遺今改爲夢錫得鍇之學于鉉遂荐于朝授右拾遺則事迹不合傳末忽入卬角女子夢巨徒簾物云云數十言

則小說家言不應入史惟潘佑傳文與宋本陸書同
不若毛刻之脫落從字亦不作從蓋所見猶宋本也
光緒十年七夕識

宋葉方輿勝覽跋

新編方輿勝覽七十卷題曰建安祝穆和父編前有
嘉熙己亥呂午序及穆自序宋刊宋印本每頁十四
行每行大字十四小字廿三邊闕外有府州名其書
首叙建置沿革次爲事要以白質黑文別之事要之
中分郡名風俗形勝山川宮殿宗廟館閣學校井泉
堂亭佛寺道觀祠廟古迹名宦人物題詠四六各類
以黑質白文別之王象之輿地紀勝亦成于理宗時
與穆同時不相謀而相似象之繁而和父簡象之意
在備作詩之用故所採詩幾倍于和父此則意在備

四六之用故所採四六倍于象之觀李重輿地紀勝
序及穆自序可見也提要謂名爲地理實類書誠篤
論也穆爲朱子母黨曾從朱子游而沾沾于兔園冊
子亦淺之乎爲丈夫矣卷中有鎮江揚州甯國三郡
太守白文方印樹經堂藏書朱文方印炳喆道人白
文方印拙修堂藏書記朱文方印呂序系竹坡手書
圖湛道勁得蘇之神可愛也

宋槧咸淳臨安志跋

咸淳臨安志一百卷前有潛說友自序宋刊宋印本
卷一卷八十一至八十九卷六十五六十六凡十二
卷皆抄補卷六十四卷九十卷九十八卷九十九卷
一百皆缺每頁二十行每行二十字小字雙行版心
有字數及刊工姓名宋諱皆缺筆語涉宋帝皆提行
年號亦空一格卽百宋一屋賦所謂臨安百卷分豆
剖瓜海鹽常熟會叢竹垞者也字體圓勁刊手精良
不下北宋官刊杭州汪氏新刊本摹刊亦精視此則
有霄壤之判矣卷七十五七十八有毛晉之印朱文

方印毛氏子晉朱文方印卷二卷四十六卷五十四
卷六十卷六十七卷八十一有高平家藏朱文方印
朝列大夫之章朱文方印又一印不可辨後有黃蕘
剛四跋述得書源流甚詳黃歸于汪閔原汪歸于郁
泰峯光緒八年歸于顏宋樓吳兎牀拜經樓所藏刊
本二十卷影抄七十五卷今歸杭州丁松生大令徐
健菴傳是樓藏本後歸高江村乾嘉間爲鮑以文所
得歸之孫氏今歸山東楊氏海源閣

宋槧咸淳毘陵志跋

重修毘陵志三十卷史能之修前有能之自序宋咸淳刊本每頁十八行每行二十字版心有字數案能之字子善初尉武進廉恪不擾嘉熙中知高郵州咸淳二年以太府丞知常州增節浮費以浚後湖民賴其利見宋史史彌華傳及常州府志延祐四明志毘陵志創于三山教授鄒補之見直齋書錄解題咸淳四年能之重修宋本今存卷七至卷十九又卷二十四餘抄補卷十二第四頁後缺若干頁末頁版心頁數字挖改爲十字究不知爲第幾頁卷十三缺第十

三頁常州趙味辛氏新刊本似卽據此本付刊改四
卷挖改之末頁爲第五而與第四頁沿江兵民接連
改卷十三之第十四頁爲十三而與十二頁兎絲子
接連其謬甚矣明之華氏刊宋諸臣奏議不辨缺頁
而誤連之頗爲嘉道間名公所議不謂味辛亦蹈其
失也

至順鎮江志跋

至順鎮江志二十一卷不著撰人名氏永樂大典傳抄本

四庫未收阮文達進呈愚案成化鎮江志丁元吉序曰勝國俞用中至順志例加精密乾隆鎮江志俞希魯傳云至順中嘗著郡志序事精密則此志乃俞希魯所撰希魯字用中鎮江人父德隣宋室遺老希魯學業精博淵貫羣籍境內碑碣多所撰述以茂才除慶元路教授善于啟迪擢歸安丞築海鹽塘費省而民不勞升江山令改永康遷松江府同知所至葺廟

學聘名儒講說平民徭役卒年九十著有竹素鈎元
二十卷聽雨軒集二十卷及此書見嘉慶丹徒志

元槩東京夢華錄跋

幽蘭居士東京夢華錄十卷元槩本每頁廿八行行
二十二字前有紹興丁卯自序以張海鵬刊本校之
張本標題無幽蘭居士四字自序孟元老上增東京
二字每卷增宋孟元老撰四字目錄卷三醫鋪上奪
諸字卷八增六日崔府君云云十九字卷四潘樓東
街巷條衣物圖畫物譌服東榆林巷下奪西榆林巷
四字飲食果子條霜蜂兒蜂譌蜂卷三相國寺萬姓
交易條案轡弓劍弓譌乃卷六元旦朝會條亦士服
立班下衍行字其服下衍用字三佛齋下衍使字遼

使在左都齋在謁舍人使朝辭人謁大立春條花粧
蘭坐下奪上字車駕幸五嶽觀條太尉知閣御帶御
謁玉蓋御帶者帶御器械乃官名非帶名也卷七清
明節條謂之子推燕下行子凡二字四野下行皆字
但一百五日下午衍爲字開金明池瓊林苑祭明金龍
牀牀謁狀駕幸寶津樓條殿之南下行東字諸軍呈
百戲條內一人內謁曰男子百餘人人謁入駕回鑾
儀條八日閉池雖下行大字卷十末則幸甚下增孟
元老議四字此皆後人妄增妄改處不如元本之善
卷中有顧元慶印白文方印顧氏朱文葫蘆印吳郡

顧元慶氏珍藏印朱文方印後有黃堯圃兩跋及士
禮居堯圃過眼黃丕烈之印案元慶松江人與王穉
登友善工書畫富收藏

雍正江都縣志跋

江都縣志二十卷雍正七年知縣事平湖陸朝璣所修也其書掛漏甚多尤謬者人物李正民傳也案正民字方叔元豐中御史中丞定之孫累官中書舍人禮部侍郎知吉州知遂甯府十年降金十二年放還遂不復用以宮祠終弟長民字元叔博雅如正民而文詞過之宣和元年中博學宏詞科上廣汴都賦由此進用建炎二年除祕書省正字五月監南岳廟紹興二年守監察御史三年知處州十年除朝請郎知泗州移建昌軍十三年八月奏言宣和以前通令佐

並管學事軍興以來學校之教中輟今和議已成儒風復振請依舊從之移郢州廿六年遷江西提刑明年爲葉義問論罷見繫年要錄中興館閣錄揮塵餘錄正民傳所敘令佐帶管學事奏乃長民事也與正民無涉合而爲一未免張冠李戴想宋時舊誌正民長民必有合傳明人妄有刪削遂合爲一朝璣又仍其訛耳

新修鄞縣志跋

鄞縣志七十五卷同治中我友內閣中書鄞縣徐柳樵時棟所修也舍人博涉多通至老不倦一身精力萃于此書採摭宏富攷訂精密體例悉仿阮文達廣東通志謝蘊山廣西通志而精博過之實爲近來志書中之善本惟楊煒事迹詳于繫年要錄孫覲鴻慶集楊君墓誌而皆未採朱輔爲朱翌新仲之季子字季公見葉錢溪蠻叢笑序翌傳有軹無輔戴埴爲戴機之孫嘉熙二年進士見寶慶四明志箸有鼠璞機傳雖附埴名而藝文志不載鼠璞進士表亦無其名

皆百密之一疏也

元槧通典跋

通典二百卷題曰京兆杜佑字君卿纂前有李翰序
一百卷後有丁未歲杪李仁伯恕甫跋丁未爲大德
十一年蓋元成宗時刊本也卷十九至二十一六十
一至六十五八十一至八十五抄補是書北宋時有
鹽官縣雕本至元而版已亡臨川路總管楊錦山乃
命諸學刊成見李仁甫跋卷二十六至卷一百爲撫
州臨汝書院所刊每卷有撫州路臨汝書院新刊湘

中李仁甫校正兩行一百七卷後有臨川學教諭晏仲容直學連元壽照對訖兩行一百卷後有直學吳用珍監刊一行每葉二十八行每行二十六字版心有第幾冊三字及刻工姓名共分四十冊鹽官本每葉二十行每行二十八字當卽此本所從出

國初爲季滄葦所藏有江左朱文方印季振宜藏書朱文長印御史之章白文方印季振宜印朱文方印滄葦朱文方印嘉慶中歸袁又愷有袁又愷書朱文長印袁廷樞印朱文方印五硯主人朱文方印蘇州袁氏五硯樓藏金石圖書朱文方印

新刻五代會要跋

聚珍本五代會要凡錯簡二皆連而爲一其第一第十
六卷祠部門僧尼籍帳內無名下今臣檢點至年月
日同者四百餘字乃禮部門後唐天成三年和凝奏
也上接未曾團奏下接否委無虛謬句者字則後人
所妄增也舊抄本不誤卷二十一選事下周廣順三
年五月勅三選已上及未成功下開宿引納家狀至
三月十五日過官五百餘字乃選限門周顯德五年
吏部流內銓狀上接南曹十月內下接舉三月三十
日云云功字則後人所妄增也抄本誤同惟冊府元

龜六百三十四引不誤上年蘇州書局重刻五代會
要陳辰田明經從余借抄本校訂卷十六之誤已據
抄本改正惟卷二十一之誤尙仍其舊他日當遺書
明經改刻數頁俾成完璧抄本卷首王溥結銜卷末
校勘官宋瑋銜名文寬夫施元之兩跋皆聚珍本所
無今本刻附于後善矣惟王溥題名仍照聚珍本式
學者不得見宋本舊式爲可惜也

朝野雜記跋

朝野雜記甲人二十卷乙人二十卷聚珍印本宋李
燾撰以舊抄本校一過前多宣取繫年要錄指揮兩
道國史院公牒一首無名氏序一首卷一恭淑韓皇
后條八月下刻本脫歸于邸第封新安郡夫人十六
年三月封崇國夫人二十字卷四續通鑑長編目下
脫九朝通略東都事略八字卷六近歲堂部用闕條
末脫小使臣初用五年一月□□吏部請用季闕慶
元六年閏六月半闕許之凡雙行小註廿八字卷十
史館專官下脫陸務觀本末五小字卷十一鎮撫使

條羣臣多以爲不可刻本多誤靈卷十六營田條農
器下脫以之別細四字卷十八四川廂禁民兵數條
此乾道之籍也上脫而兵民保甲不仰給者八萬餘
人興元良家子條實備它用下脫又私置鹽店六所
及收諸津渡鹽稅以給焉紹熙末楊嗣勳申嚴鹽法
奏言本府自有義士廂禁軍良家子四十五字川秦
買馬條脫小注歲收茶帛數五字乙人卷十二愛王
之叛條末脫小注八十字卷十五太學生校定新制
條嘉定中下脫在上庠有聲然公試未嘗與選十二
字十六四川收兌九十一界錢引條不能守其初約

也下脫一百七十一字其一二字異同奪落無關文義者不勝枚舉耳

原本麟臺故事跋

麟臺故事題曰紹興元年七月朝請郎試祕書少監程俱記從錢叔寶手抄本影寫存卷一上卷二中卷三下三卷此本有而大典本無者四十條此本無而大典本有者沿革省舍儲藏職掌恩榮祿廩四門又修纂門兩條選任門四條官聯七條又周必大玉堂雜記引故事大宴一條中興館閣錄引三館祕書一條大典本及此本皆缺

影元抄秘書志跋

秘書志十一卷題曰承務郎秘書監著作郎東平王
士點繼志承事郎秘書監著作佐郎曹州商企翁繼
伯同編前有文移影寫元刊本所記皆元秘書省典
故分十九門案元史至元二十七年立興文署召集
良工刊諸經子史板本今此書載至元十年十一月
太保大司農奏興文署雕印文書屬秘書監本署設
官三員令一員丞三員校理四員楷書一員掌紀一
員鐫字匠四十名作頭一匠戶十九印匠十六又至
元十四年十二月中書省奏奉旨省併衙名興文署

併入翰林院是至元十年以前已有興文署之名不
始于二十七年可據以正元史之誤卷四表背物件
後與目錄多不合第二十一頁聖朝自開國以來云
云與第十一卷第十頁有複屏卷七卷八有缺文惜無
別本可以校補觀其所記庫中儲書一萬八千餘冊
法書三百九十九卷四百八十二軸名畫一千一百
五十六軸三百七十一卷可謂富矣而賈似道眞容
兩軸亦在收納之例毋乃不別薰蕕乎第五卷載趙
文敏書千字文進御而發被背者至十七卷之多可
知文敏一生書千字文不少宜其流傳之多也

慶元條法事類跋

慶元條法事類八十卷附開禧重修尚書吏部侍郎
右選格二卷不著撰人姓氏舊抄本

四庫未收阮文達亦未進呈原缺卷一卷二卷三首
數翻卷十八至二十七卷三十三至三十五卷三十
八至四十六卷五十三至七十三凡四十二卷案陳
直齋書錄解題云嘉泰條法事類八十卷宰相天台
謝深甫子肅等表上初吏部七司有條法總類淳熙
新書既成孝宗詔仿七司體分門修纂別爲一書以
事類爲名至是以慶元新書修定頒降則此書卽謝

深甫所修以奉詔時言之則曰慶元以成書日言之則曰嘉泰非二書也宋史甯宗本紀慶元四年九月頒慶元重修勅令格式嘉泰二年八月謝深甫上慶元條法事類三年七月頒行則當時本名慶元條法事類曰嘉泰者直齋所獨也書雖殘缺可以補史志之缺者尙多如玉海載建隆考課條有四善四最而四最僅有其三至民籍增益進丁入老爲生齒之最一條則惟見于此書他如十科薦舉之令由于紹興三年三省樞密請復舉行元祐司馬光之法見宋史選舉志武臣薦舉之格由于隆興元年正月三省密

院所奏見王海銓選類其沿革損益不及此書所載
之詳甯宗紀慶元二年十一月重修吏部七司法開
禧元年六月陳自強等上二年頒行開禧重修尚書
吏部右選格者疑卽自強所上也陳氏書錄有吏部
條法事類五十卷今不傳此二卷其僅存者歟

影宋抄營造法式跋

營造法式三十四卷題曰通直郎管修蓋皇弟外第
專一提舉修蓋班直諸軍營房臣李誠奉聖旨編修
前有營造式法所奏及誠進書自序看詳十三頁後
有平江府今得紹聖營造法式舊本日錄看詳共十
四冊二行紹興十五年五月十一日校勘重刊一行
文林郎平江府觀察推官陳綱校勘寶文閣直學士
右通奉大夫知平江軍府事提舉勸農使開國子食
邑五百戶王與重刊二行每頁二十行行二十二字
影寫宋刊本

四庫所收據天一閣范懋柱所進缺第三十一卷从
大典補全此則猶原本也案誠字明仲鄭州管城人
以父南公蔭補郊社齋郎調曹州濟陰尉元祐七年
爲將作監主簿紹聖三年爲將作監丞崇寧元年爲
將作少監二年爲京西轉運判官遷將作監大觀初
知虢州四年卒誠博學多藝能藏書數萬卷手抄者
數千卷工篆籀草隸又工畫嘗畫五馬圖以進著有
續山海經十卷續同姓名錄二卷琵琶錄三卷馬經
三卷六博經三卷古篆說文十卷及此書見北山小
集李君墓誌看詳稱總釋二卷制度一十五卷功限

一十卷料則三卷圖樣六卷目錄一卷總三十六卷
今本三十四卷目錄一卷首尾完具並無缺佚與墓
誌所云三十四卷合總例功限料則圖樣亦與看詳
合惟制度十五卷今實十三卷乃知五字蓋三字之
訛非有所合并也除目錄計之則爲三十四卷合目
錄計之則爲三十五卷六蓋五之譌耳看詳引通俗
文云屋上平曰脯必弧切可以補臧鏞堂輯本通俗
文之缺引周髀算經云矩出于九九八十一萬物周
事而圓方用焉大匠造制而規矩設焉或毀方而爲
圓或破圓而爲方方中爲圓者謂之圓方圓中爲方

者謂之方圖焉今本周髀筭經九九八十一之下脫
萬物周事云云四十九字可據此書補之

儀顧堂題跋卷五

歸安陸心源剛甫著

祕書省續編四庫闕書目跋

祕書省續編到四庫闕書二卷題曰紹興改定明藍格抄本

四庫未收阮文達亦未進呈直齋書錄解題王氏玉海著于錄案崇文總目六十四卷每書之下各出新意著說紹興中去之僅存其目題曰紹興改定見晁陳兩家書目此本當亦有註紹興中去之故亦題改定也其目經居首史次之集又次之子列于末其缺

者註闕字于書名之下嘉祐訪求遺書詔並目一卷
見通志藝文略大觀四年五月七日祕書監何志同
奏慶厯摠目號爲全備者不過二萬餘卷闕逸甚多
請頒其類求訪見玉海卷五十二曰續編者仍嘉祐
大觀而言之也玉海又載治熙祕閣諸書庫有續搜
訪庫經史子集二萬三千一百四十五卷是紹興以
後陸續搜訪得書甚多此必紹興末年祕閣底本故
已得者不注闕字鄭樵據祕書省所頒闕書目錄集
爲求書缺記七卷外記十卷當卽據此本爲之耳

遂初堂書目跋

遂初堂書目一卷題晉陵尤袤延之撰舊抄本前有
毛升序後有魏了翁跋陸友仁跋宋以前書目如崇
文總目晁氏讀書志陳氏書錄解題鄭氏通志藝文
略馬氏端臨經籍考皆著書名不載刻本校本惟此
書所載有杭本周易周禮公羊穀梁舊監本尚書禮記
論語孟子爾雅國語京本毛詩高麗本尚書江西本
九經川本史記前漢書後漢書三國志晉書嚴州本
史記吉州本前漢越州本前漢後漢湖北本前漢杭
本舊唐書後唐書川本小字大字舊唐書川本大字

通鑑小字通鑑校本戰國策羅列版刻兼載校本爲
白來書目創格延陵季氏傳是徐氏宋元刻本書目
之濫觴也

衛本郡齋讀書志跋

昭德先生郡齋讀書志二十卷題曰門人姚應續編
前有晁公武自序舊抄本案公武字子止鉅鹿人紹
興進士見四川通志爲四川轉運使井度屬官紹興
十四年階成岷鳳四州并屬利路爲經畧使者有旨
令安撫使倣雄州安撫司例措置申樞密院一府隅
貽莫知其原公武言此景德三年故事願與今事不
類宣撫司鄭剛中卽用其言奏析利州路爲東西由
此益重之趙不棄總領四川宣撫使錢糧辟爲主管
文字十七年以左朝奉郎通判潼川府以趙不棄薦

知恭州見繫年要錄一百五十六移知榮州見自序
又知合州見四川通志清華樓記轉潼川路轉運判
官二十七年爲侍御史王珪劾罷見繫年要錄一百
七十八以金安節薦爲侍御史隆興二年湯思退罷
相洪适草制作平語公武擊之見金安節傳及岳珂
桎史乾道四年以敷文閣待制爲四川安撫制置使
見宋史孝宗紀時米價騰貴公武以錢三百萬緡糴
米六萬石賑糴民賴之見四川通志五年知興元府
請以屯田三年所收最高一年爲額等第均數召佃
收兵及保甲以護邊從之復爲四川制置使六年移

州沙平蠻寇邊焚礪門砦公武調兵討之失利又與
王炎不協罷見宋史孝宗紀食貨志七年以敷文閣
直學士左朝議大夫爲臨安少尹明年罷見臨安志
謂嘉定之符文鎮山川風物近似洛陽因家焉見輿
地紀勝箸有易詁訓傳尙書故訓傳詩詁訓傳中庸
大傳春秋故訓傳稽古後錄昭德堂藁嵩高樵唱及
此書見宋史藝文志

郡齋讀書志跋二

衛本郡齋讀書志卷四字說偏旁音釋一卷字說疊解備檢一卷不見撰人名姓愚案老學菴筆記字說甚行時有唐博士耜韓博士兼皆作字說解數十卷又有劉全美者作字說偏旁音釋一卷字說備檢一卷又以類相從爲字會二十卷據此則偏旁備檢二書皆全美所著也

衢本郡齋讀書志跋三

讀書志卷十四印格一卷皇朝晁克一撰張文潛甥也文潛嘗爲之敘略曰克一既好古印章其父補之愛之尤篤悉錄古今印璽之法謂之圖書譜袁本讀書後志同愚案克一姓楊名吉老文潛嘗云吾甥楊吉老本不好畫竹一旦頓解便有作者風行晁旡咎人有贈文潛甥克一學與可畫竹詩又見鄧椿畫繼父補之歷官鄂州支使見宛邱人卷二十六讀書志所引文潛序略見宛邱人五十六原本讀書志必作楊克一校者見有其父補之四字心中習知有晁補

之而不知有楊補之遂改楊爲晁不知晁補之娶戶部侍郎杜純之女二子長公爲次公似見宛邱所撰墓志安得爲文潛甥乎汪鐘刻讀書志跋曰與吳縣黃丈堯圃互相商榷增補缺失一字訂訛往來之書日再三返乃克一姓楊非晁宛邱人畫繼非僻書屢屢可証而妄更其姓真有不如其不刻之歎矣

寶刻類篇跋

寶刻類篇八卷不著編輯者姓氏永樂大典傳抄本是書藍本于陳思寶刻叢編改頭換面而以鄭夾漈通志金石略朱長文墨池編附益之殊少心得凡碑之無書人姓名者皆不錄體例尤未盡善碑目僅二千有餘亦不及叢編之富所載書人以范式碑爲蔡邕書時代不合以華山碑爲郭香察書未知察字之義他如禮器碑爲金鄉師曜奴等書衡方碑爲郭登書武班碑嚴祺書張遷碑爲孫興祖書皆具本碑而反遺之亦疏陋之甚者惟當時所據寶刻叢編不若

今之殘缺羣亂既可補叢編缺卷之目亦可校叢編
羣亂之訛宜爲金石家所取資也

輿地碑目跋

輿地碑目四卷宋王象之撰舊抄本案象之字儀父
一作肖父東陽人慶元丙辰進士博學多識著輿地
紀勝二百卷見吳師道敬鄉錄是書從輿地紀勝每
州碑記門摘出疑明儒楊用修所爲惟所見輿地紀
勝似亦不全故外奪亦往往而有如安吉州碑所據
宋本輿地紀勝卷四第二十六頁與二十七頁倒訂
致吳大帝廟碑下談以湖州刺史題名記注晁公武
合州廳記云云羣入接連紹興府碑從嚴寺碑起考
紹興有香嚴寺無嚴寺蓋所見宋本紀勝缺卷十之

第三十一頁共三十二頁從巖字起故也其前尙有
禹陵窆石遺字秦李斯秦望山碑曹娥碑蕭將軍廟
碑桐柏山金庭館碑齊永明中石佛銘南明山梁碑
隋禹廟碑江淹碑虞世南碑賀知章二詒龍瑞宮記
高行先生徐師道碑及注約四百字卷二茶陵軍碑
記後有江陵府上碑記缺七字考紀勝江陵府分上
下二卷上卷爲沿革風俗形勝景物三門本無碑記
殆抄胥不知文義者所妄加也

法帖釋文跋

法帖釋文十卷宋劉次莊撰案次莊字中叟長沙人
熙寧六年進士爲蔡確密客博洽淹貫詞翰絕倫元
豐中累官宗正丞八年爲殿中侍御史奏言倉部起
請乞將賈青買到建茶五千斤往河北出賣不獨猾
商乘影接迹潛冒賈販而姦細之人亦必轉入敵界
敵旣知其物之重輕又復可以必致則異時賜與將
不爲珍矣伏望特賜止絕又奏府界提點范侗于祥
符等縣許人買撲都宰殺豬羊及果子牛牙勾當戶
部見行舉問及訪聞京西路轉運副使沈希顏亦于

本部置棚拘攔人戶買賣牛馬出納淨利近因陳向到任方行改正二吏措克妄有造立無有條法伏望委官根究詣實重行黜降元祐元年奏言熙寧以來新變役法其意欲以均惠利民蓋富厚之家安寧休佚而貧民日入于困乏乞合郡縣之議斟酌上聞尋出爲江南西路轉運判官復以交通蔡碩盜用軍器監錢抵罪除名謫居新淦築室東山寺前俯瞰清流自謂有濠梁趣因號戲魚翁時稱爲高師今縣東有高師湖以次莊得名見江西通志通鑑長編

粵正堂刻僞某竹堂書目跋

某竹堂書目六卷粵東伍氏刊本前有文莊自序與文莊集涇東稿所載合後有五世孫恭煥七世孫國華跋校以明文淵閣書目書名分類冊數一一皆同惟卷首聖製類刪去祖訓文集實錄官制法令等書數百種卷末刪舊志新志兩類古今志一類則刪島夷志以下數十種而已閣目每書皆載數部注明全缺此則每書祇錄一部不注全缺但取閣目冊數最多者錄之文莊原序爲卷二萬有奇冊四千六百有奇今冊計二萬三百有奇浮于原序五倍卷雖無考

以書錄解題千頃書目所載約計當在二十萬外浮于原序十倍伏讀

四庫提要萊竹堂書目六卷經史子集各一卷卷首曰制乃官頒各書及賜書賜勅之類末卷曰後錄則其家所刊及自著書有成化七年自序大率本之馬氏經籍攷別出舉業類而無詩集亦略有增損又別有新書目一卷附于後中載夏言王守仁諸人集蓋其子孫所編云云案此本卷首雖有聖製而不曰制又無後錄亦無附目卷中有詩集而無舉業序末亦無成化記年証與文莊自序固多牴牾與提要尤無

一合蓋書賈抄撮文淵閣目改頭換面以售其欺決
非館臣所見兩淮經進之本也恭煥及國華跋恐亦
非真粵正叢書世頗風行恐誤後學不可以不辨

拜經樓藏書題跋記跋

拜經樓藏書題跋記四卷海寧吳壽暘虞臣纂壽暘
海寧人父騫號免牀好學嗜書收藏之富與同里馬
寒中道古樓陳仲魚士鄉堂埒壽暘輯騫所題記者
爲是書頗爲江浙好事家所重余觀其書鑒別未甚
精審如校刻宋史全文之游明乃正統六年進士而
以爲元時坊刻徐達左吳人輯有傳道四子書曾子
乃四子中之一種既不知傳道四子爲何書亦不知
達左之姓徐性理羣書句解後編三十三卷宋熊節
編熊剛大註前爲朱子近思錄後爲蔡節齋近思續

錄別錄既不知爲熊節所編剛大所注並沒羣書句解之名而題爲近思正續錄黃鶴註杜與高楚芳千家杜詩截然爲二而誤爲一至正六年江右肅政廉訪使夏臺鑑伯溫所刻道園學古錄乃大字本見景泰本學古錄葉盛跋免牀所藏每葉二十六行者正景泰本也書賈割去葉跋免牀亦認爲元刻皆疏謬之大者此外以明刻爲元刻元刻爲宋刻者亦復不少壽暘僻處海濱見聞寡陋原無足怪獨怪耳食者流奉爲金科玉律殊可笑耳

聞有益齋讀書志跋

聞有益齋讀書志六卷上元朱述之先生所箸也先生諱緒曾道光初舉人一目十行無書不覽藏書甲于江浙累官浙江秀水孝豐知縣有循聲其書仿郡齋讀書志之例而精核過之惟古今分門類事一條謂爲宋如璋之父所箸不免千慮一失案卷八先大夫龍泉夢記云如璋不才虛服靈夢誠不敢忘謹鐫于石以報神貺政和七年三月日宋如璋記是如璋自記其夢之辭也曰先大夫者子述其父之辭也與下文蒲教授荆山夢記卽採蒲威臨之文同若非其

子所箸當曰宋大夫龍泉夢記矣如璋眉州人崇寧五年進士見四川通志進士表是書成于乾道己丑上距崇寧五年六十四年卽使如璋早達亦將九十歲人矣其爲如璋之子所述無疑也

帶經堂陳氏書目書後

帶經堂書目五卷侯官陳蘭隣大令所藏書也經部則有影元抄張清子周易本義附錄纂注十六卷舊抄金仁山尚書注十二卷明抄張洎古禮二十五卷有乾道曾逮序史部則有明抄李丙丁未錄四冊明抄劉恕十國紀年四十二卷楊仲良長編紀事本末殘本馬永錫職林四卷子則有影宋本世說新語五卷集則謝在杭抄唐黃滔泉山秀句集十卷有楊萬里洪邁序原本趙湘南陽集十卷宋劉筠應言榮遇禁林三稿三卷影宋抄原本王珪華陽集五十卷明

抄陳了齋集三十卷明刊宋李淑書殿集十四卷影
宋抄蔣之奇荆溪前後集八十九卷別集九卷外集
三十卷元至元刊本宋元絳玉堂集二十卷有梁寅
序影宋張舜民畫墁集存十八至三十三四十七至
五十六七十二至七十四凡二十九卷原本鄭俠西
塘集二十卷原本劉跂學易集十二卷殘本蘆川歸
來集存卷六卷七卷十二三十四卷十六凡六卷
明抄林通抄筆集四十卷元大德刊尤袤梁溪集五
十卷有曾幾序及杭州聚德堂鋟梓一行有岫字小
印明抄家鉉翁則堂文稿二十卷明抄足本趙文青

山集八卷明抄宋禧庸庵集三十卷皆明以後所久
佚者宋元刊本則元刊周易會通書義矜式宋刊儀
禮經傳通解三十七卷續廿九卷淳熙刊孝經注元
刊融堂四書管見嘉祐本說文解字三十卷乾道本
楚辭宋刊九家注杜詩元刊離騷草木疏宋刊董杲
廬山集五卷英溪集一卷亦世所罕見者予粵東歸
田本無出山之志後聞陳氏藏書散出多世閒未有
之本遂奉檄一行昔小山堂主人聞陳一齋藏書散
出有閩中之行余亦同此意也及至閩遍訪陳氏後
人僅得張清子周易纂注金仁山尚書注楊仲良長

編紀事本末三書餘皆不可得其孫字星村者亦畧知書詢以各種祕冊則云最祕之本其先人別儲一樓爲蟲蝕盡或者當在其中其信然耶周季貺太守謂其目爲星村所偽造然如梁溪集玉堂集等皆注明藏印及序人姓名恐非偽造後之人其再訪之

書金石學錄後

金石學錄四卷嘉興李遇孫金澗輯道光四年阮元序搜羅雖富疏漏甚多如蔡珪字正甫松年之子靖之孫金史有傳而列于宋人蔡條之前陳思孝名登明史文苑有傳工篆籀究心金石之學楊東里稱其收蓄之富爲歐趙以後所僅見是錄于鄭文寶下旣引其語而不列其人李燾字仁甫號巽岩四川丹稜人著有通鑑長編宋史有傳史繩祖學齋佔畢載其建武中元治道記跋今旣誤燾爲壽又有李燾傳于李壽則著其號巽岩于燾則不著其字號皆疏舛之

大者此外宋元明人掛漏不少長夏無事搜得四十
餘人別爲補錄一卷以補其缺光緒五年五日識

影宋抄史通跋

史通二十卷首行上題史通下題劉氏中題內篇外篇等字每卷有目連屬篇目明人照寫宋本每頁十八行每行十八字日後有總結云右定凡三十六篇并前序及誌第七篇共二十八篇以明陸文裕本

國朝浦起龍通釋本互校浦本多與影宋本合陸本校正固多而妄刪誤改者亦不少盧抱經所稱影宋本與此本同出一源其善處盧氏已盡錄于羣書拾補中是書明刊以陸本爲最先張之象又翻陸本西江郭延之據張本重刊而加評王維儉又據郭本而

加註

國朝黃叔琳又據王本刪訂重刊浦起龍通釋本雖不言所自而與此本皆合則當見影宋本矣惟卷十七諸晉史篇寄出外戚傳下宋本有案外戚傳四字浦本亦奪而註云凡例語止此此下疑有關文似所見宋本亦不全其云一本作某者大抵指陸張郭王諸本而言間有從他本而以宋本爲別一本者惜外篇卷十四惑經篇削尋春秋所書實乖斯義九字卷三五行志篇卷七直言篇卷十八雜說下于原注皆有所刪削不及此本之善

宋板讀史管見跋

致堂先生讀史管見八十卷題曰檄猷閣直學士左
朝請郎提舉江州太平觀保定縣開國男食邑七百
戶賜紫金魚袋胡寅明仲撰前有淳熙壬寅簽書平
海軍節度判官孫胡大正序後有大正識宋諱殷匡
貞恒桓構慎瑗皆缺避每頁二十四行行二十二字
版心有字數據大正序淳熙以前無刊本至大正官
溫陵始刊于州治之中和堂乃此書初刊本也其後
嘉定十一年其孫某守衡陽刊于郡齋并爲三十卷
與書錄解題合有猶子大壯序明季有重刊本卽

四庫附存其目之本也姚牧庵集有此書序謂宋時
江南宣郡有刊版入元版歸興文署學官劉安重刊
之牧庵嘗得致堂手藁數紙今摹諸卷首是此書在
宋凡三刊元人又重刊之其爲當時所重可知惟嘉
定本與此本卷帙懸殊未知有無刪削惜架上無三
十卷本無从互校耳

舊聞証誤跋

舊聞証誤四卷永樂大典傳抄本心傳此書每條皆註所引書名大典本多缺恩案卷一縣吏受郡事而下之縣者条出程大昌演繁露卷十二泰之大昌字也錢若水爲樞密使條出王鞏聞見近錄張忠定爲御史中丞條出王闢之澠水燕譚錄祖宗時雖有磨勘法條系証王明清揮塵後錄之誤其前當補揮塵後錄一條眞宗旣與契丹和親一條出溫公涑水記聞劉子儀在南陽條出洪遵翰苑遺事卷二陳恭公當國條以証誤趙所記差誤語推之當出趙子耘朝

野遺事容齋四筆同進退宰相其帖例草儀條出東
軒筆錄卷十八治平四年十一月知諫院楊繪條出
李燾長編熙寧六年北人造蕭禧來議地界及地界
事久不決二條出韓莊敏遺事見大典本長編二百
二十二元豐初蔡確排王珪罷相條出邵伯溫間見
前錄卷十三詔議漢王典禮條出東都事略王珪傳
近歲前執政官到闕止繫御仙花帶條出石林燕語
韓魏公父諫議大夫國華條出馬永卿嬾真子卷五
卷三按紹聖間鄭公肅條系証揮塵餘話之誤當補
錄揮塵餘話一條章惇初貶謫元祐臣寮用白帖子

行事條以邵子文指此而云句推之當出邵子文辨誣
李孝廣崇寧間爲成都漕條出揮塵後錄十一李端
叔爲密院編修官條出揮塵後錄卷六宣和元年九
月乙卯范致虛以母憂罷條出東都事略十一國朝
宗子自附葬山陵之外條出程大昌演繁露熙寧法
宗子出仕者條以建炎元年某知鎮江府語推之當
出趙子崧朝野遺事方務德守荆南條出揮塵三錄
卷三按孟富文以辛寅九月自戶部尙書條系証揮
塵三錄卷十一之誤其前應補揮塵三錄一條卷四
李端叔作范忠宣遺表條出揮塵後錄卷六紹興戊

午夏熙州野外灤水有龍條出洪皓松漠紀聞吳才
老舒州人條出揮塵三錄魯國大長主避兵南來卜
居台州條出揮塵前錄卷三白樂天聞白行簡及禁
中鐘鼓院二條出演繁露卷十五學士院具員文臣
條以蔣所記誤語推之當出蔣魏公逸史台州筆吏
楊滌條出揮塵前錄卷三以上各條大典本皆缺書
名今爲考証如右

大事記講義跋

大事記講義九卷中興大事記四卷附錄一卷題曰黃甲省元新肇慶府學教授溫陵呂中講義省元國學前進士三山繆列蘭臯蔡柄編校附錄則中所著中興規模制度國勢三論也影寫宋刊本案中字時可福建晉江人淳祐七年進士歷官肇慶府學教授沂靖惠王府諸王宮大小學教授輪對首言當去小人之根次言革賊吏之弊遷國子監丞兼崇政殿說書奏乞晚輪二員說書夜輪講官值宿以備顧問又言進講經史乞依正文誦讀不宜節貼避忌匪特可

察古今治亂亦以革臣下諂諛之習又言人能正心則事不足爲人君能正心則天下不足治理宗嘉納丁大全忌之出知汀州在汀期年演易爲十圖景定中復舊官主管成都玉局觀見八閩通志及閩書

歷代名賢確論跋

歷代名賢確論十卷題曰錢福編集案是書

四庫所收分一百卷前有吳寬序提要云福寬二人同時不應不知爲福作福廷對第一殆書賈重刊所託名宋史藝文志之十七史名賢確論蓋卽此書愚謂提要所言誠不刊之論此本十卷與百卷本卷帙懸殊疑有刪節及讀杭州

文淵閣所存殘本與此本皆同並無缺少惟多分卷帙蓋亦書賈所合并也所採宋人之文如何去非張唐英遺集久亡賴此存其崖略每頁二十二行每行

二十四字版式如劉洪慎獨齋本文獻通攷山堂考索劉洪本閩中麻沙書賈或亦明代麻沙本歟

宋元學案跋

安定學案潘及甫慶厯中登第不知厯官所至愚案及甫字憲臣江都人博通經史厲志文行聞胡瑗倡學于湖往從之瑗見其文喜曰非諸生比也遂補學職妻以女弟慶厯中與兄希甫同登進士爲懷仁尉筠州判官及知分甯霍邱壽春三縣所至咸著政績遷祕書丞充楚王宮大學教授律宗室以禮法神宗嘉之後以屯田員外郎通判江州遷左朝散郎親族之貧寡孤幼者賴其撫卹晚得目疾每命子姪執策讀于前終日傾耳危坐無倦容未卒前一日猶卧聽

周書見雍正江都縣志

宋元學案跋二

虞申字行父丹徒人始從鄉先生姚闕受易春秋畧
通大義姚因喻申使遊京師介謁胡公瑗一見奇其
能以爲他日可任朝廷事留三年歸一時名流周伯
堅孔常父皆作詩誦其賢惜其去張君奭字鳴道金
壇人從安定先生學瑗獎予之異于流輩累荐不第
以特科調漢陽軍漢陽尉遷房州竹山令以嫌去官
再授池州石埭令在任引年告老以朝奉郎致仕見
京口耆舊傳案二人皆安定弟子之應補者

宋元學案跋三

武夷學案列葉廷珪爲同調而不詳其里貫愚案廷珪福建甌甯縣人著有海錄本事詩海錄選句圖海錄碎事等書惟海錄碎事今傳于世觀其自序海錄諸書皆爲詩料而設其人亦詩人也傳自得序稱其無日不作詩並未講學亦非治經家蓋辭章之士也萬姓統譜誤海錄爲誨錄學案遂列之武夷同調濫矣